

И се слышав король части римския от полунощныа страны таковое мужество великого князя Александра и събра силу велику, наполни корабли многы полков своих и подвиже силу великую, пыхаа духом ратным. И преиде реку великую, еже зовется Нева, и, шатайся безумием, и послав послы к великому князю Александру в Новгород Великий и, разгордевся, рече: «Аще хощеша противитися мне, то уже есми zde, пленяю землю твою и отчину Рускую».

И то слышав князь великий Александр, иде в церковь святыа Софеи и паде на колену пред олтарем господним, и нача молится богу с слезами и рече: «Боже хвалнный и предивънный, боже вечный, боже благый, создавый || морей пределы, и повеле жити не престаа». Примим псаломскую песнь, рече: «Суди, господи, обидящим мя и възбрани борющимся со мною, прими оружие и щит, встани в помощь мне». И сконча молитву и поклонися архиепископу. Архиепископ же Спиридон благослови его и отпусти. Князь же великий Александр иде из церкви, утирая слезы, нача крепити дружину свою и рече: «Не в силе бог, но в правде», помяну песнословца Давида: «сиа в оружиах, и сии на конях, мы же во имя господа бога нашего призовем». И несождався со многою силою и поиде на них в мале дружине, уповаа на святую троицу.

Жалостно бо слышати, яко отец² его Ярослав честный и великий и не бе ведал таковаго възстания на сына своего милаго Александра. Александру же не бе было послати коли весть к отцу. Уже бо бяше приближися ратнии, тем же и мнози || новгородцы съвокупишася бяху, понеже ускори князь великий поити на них. И прииде на них в день възсресения, на память святыах мученик Кирика и матери его Улиты и на память прадеда его великого князя Владимира, крестивый землю Рускую.

Имеаше же веру велику к святым мучеником Борису и Глебу, бе же некто у него муж, старейшина земли Ижерьской именем Пельбусиа. Порученна же бысть ему стража утреничнаа морскаа от великого князя Александра. И восприат святое крещение, нареченно бысть имя ему в святом Филат. Живяше же боготи угодно: в среду и в пяток пребывааше в алчбе. Сподоби же его бог видети видение страшно. Скажем же вкратце.

Пелбусий же стоящу при краи моря, стрегущу обою пути отбытия их и пребысть всю ночь || в бдении и, яко же нача възходити солнце, услыша шум страшен по морю, и виде насад гребущь. А посреди насада стояше Борис и Глеб и беста руки своя дръжаща на рамах. А гребцы их сидяща, аки мглюю одеани. А сами беаша в одеждах чеврленых. И рече Борис Глебу: «Брате⁴ Глебе, вели грести поспешно, да поможем сроднику своему великому князю Александру на помощь». Пелбусиа же, видев таковое видение и слышав таковый глас от святую мученику, и стояше трепетен, донже насад отиде от очю его. Пелбусиа же видев великого князя Александра радостныа очима поведа же великому князю единому. Он же рече ему: «Сего не рди никомуждо». И подщався на них наехати в 6 час дни. Се же бысть в лето 6744. И бе сеча зла над римляны, изби много, без числа. А сам князь великий || Александр възложи печать королеви острым своим копием.

Зде же явишася в полку Александрове 6 муж храбрых, и мужествовавших крепко. Мню бо тако, яко никто же царь таких бяху Макидонскаго Александра багатырем.

Единею — именем Алексей. Сий наехав на шнеку и въехав до самого короля и видев короля мьчяще под руку и възведе меч свои, хотя дати

² Испр.; в ркп. не отец. ⁴ В ркп. доб. Борисе и зачеркнуто.